

IN IPAN OME ITLAHCUILOLAMATZIN TLEN OQUIMOIHCUILUI IN TETIOTLATITLANIL JUAN

¹Nehhuatl Juan, in tlayecanqui ipan inon tetiotlayehualoltzin Dios. Niteihcuiluiya, notlasohicniu. Nicmati se tohueltiu niquihcuiluiya molui tlasohtli, se teconeu in Dios, ihuan ipiluan aquin noyojqui niquintlasohtla. Huan ijcon nochin aquin quimatihque in tlanehnehuilistli melahuac noyojqui quintlasohtlahque.

²Namechtlasohtla tleca timosetilihtoque ica inon tlanehnehuilistli melahuac. ³Dios Tohueyitahtzin huan Totecohtzin Jesucristo Iconetzin Tohueyitahtzin mechuelitalos melahuac ica tetlasohtlalistzin huan namoca tlocoyalos huan ic inon ayacmo tlen mechyolmohsihuis.

⁴Onechpacmacahque ic onicmat quen sequin mopiluan quinehnehuilayahque ijcon quen Dios Tohueyitahtzin technextililohtoc. ⁵Huan axan tohueltiu, nimitztlatlauti ya quen matimotlasohtlacan se huan oc seya. Inin tlen nimitzihcuiluiya ahmo se yancuic tlanahuatili, tlahmo yiyehhua in tlen ticpixtoque

den achto. ⁶In tla titetlasohtlasque in Dios, tictlacamatisque ica tlen techiluilos. Huan yinanquicactoque den achto inon tlanahuatili quen matimotlasohtlacan se huan oc seya.

In tlahcayaucamen

⁷Ipan in talticpactli oncan miyacten tlahcayaucamen, aquin quinnextilayahque mach Jesucristo ahmo ohualuilohuac quen tlatatl. In aquin ijcon quihtos, yeh in tlahcayauqui huan teixnamiquis in Cristo. ⁸Ximomalui can niyan aquin ahmo mechcayahuas ic nanquipolosque namotlaxtlahuil ica namotequiu. Huan xixxicocan ica namotequiu ic nanquiselisque nochin namotlaxtlahuil.

⁹San aquin ahmo tetlacamatis in tlen oquinextililoc in Cristo, in Dios ahmo mocahualo iyolihtec. Huan in aquin quimocahuiya inon tetlanextilil in Cristo, mocahualo iyolihtec in Tohueyitahtzin Dios huan noyojqui in Iconetzin Jesucristo. ¹⁰In tla seya de inin tlahcayaucamen cualnextilis san tlen oc se intlanextilil, ahmo

xicsehuican ipan cali, niyan ahmo
xicyolchicahuacan. ¹¹Huan in aquin
quitlahpalohua huan quiyolchicahua
inon tlacahcayauqui ijcon quimosetiliya
ica in ahmo cuali tlen quichihua.

In tlahtolten tlen ic tlamis

¹²Nicpiya miyac tlen
namechiluini, huan ahmo

nicnequi namechihcuiluis, tleca
nicnequi niyas namechitas huan
timonohnotzasque, huan ijcon yec
timopacmacasque.

¹³Mechtlahpalohuahque
in ipiluan tohueltiu
tlasohtli, inohque noyojqui
tetlapehpeniluan in Dios. Ijcon
maye.